

成實論

卷一

四百一
西一

50846



成實論卷第一

西

訶梨跋摩造

姚秦三藏鳩摩羅什譯

發聚中佛寶論初具足品第一

前禮所應禮

自然正智者一切智應供

大師利世間

亦禮真淨法及聖弟子眾

今欲解佛語

饒益於世間論應修多羅

不違實法相

亦入善寂中是名正智論

譬如天日月

其性本明淨煙雲塵霧等

五翳則不現

邪論覆正經其義不明照

正義不明故

邪智門則開罪負惡名聞

心悔疲倦等

此衰惱亂心皆由邪智起

若人欲除此

罪負等衰惱為求正論改



當近深智者 親近深智者 是正論根本
因此正論故 能生福勝等 雖有利智人
誦百千邪論 於衆不能得 辯才名聞利
知佛法第一 說亦得樂果 欲令法久住
不爲名聞故 廣習諸異論 遍知智者意
欲造斯實論 唯一切智知 諸此丘異論
種種佛皆聽 故我欲正論 三藏中實義
於是說論問曰我今知汝說成實論汝先言
前禮所應禮所謂爲佛何故名佛成何功德
故應禮所應禮耶答曰佛名自然人以一切
種智知一切法自相差別離一切不善集一
切善常求利益一切衆生故名爲佛教化所

說是名為法行此法者名之曰僧如是三寶
應禮因緣我今當說佛五品具足故為世間
天人所敬問曰諸餘聖人亦復有此五品功
德與佛何異答曰佛五品法具足清淨所以
者何身等諸業無錯謬故戒品具足佛尚不
誤毀禁戒況當故犯又久集慈悲惡心不發
如經中說佛語阿難若人從生習慈能起惡
不不也世尊佛久集善性不為自守怖畏名
聞而持禁戒又於無量佛所久修戒行拔三
毒根永無餘習以是等緣戒品具足定品具
足者佛依是定得一切智以此故知定品具
足如蘇油多燈炷大放光明亦大又佛定堅

固如漆漆木餘人禪定如華上水不得久住
又佛禪定於無量劫次身漸成故能具足又
如來定不待衆緣若人若處若說法等餘人
不令又如來定常深修習如人自守恒憶不
忘佛入禪定不加心力又譬如人自於住處
及自語言安隱無難佛處定中亦復如是故
言如來常在三昧又壞禪定大喜等法佛悉
善斷又久果報定得自在神通最勝第一以
如意通於一念頃能過十方無量世界一切
所爲隨意即辦於諸變化自在無礙心能普
周一切諸法其餘衆生莫能及者又佛成就
聖自在法於可樂中性不樂想於不樂中能

生樂想於樂不樂能生捨想問曰於不樂中
可生捨想云何於中能生樂想答曰善修心
故於惡口等不樂法中不以爲礙於餘神通
天眼天耳知他心智宿命通中亦無所礙以
定力故神通無礙於諸禪定通達明了其餘
衆生不聞其名惟有如來出入無礙又佛禪
定名之爲力如十力中說餘人無有是故如
來定品具足慧品具足者有二種無明一障
禪定二起煩惱如來悉斷斷相違慧破品具
足有得自然法不從他聞巧於言辭善知義
趣辯才無竭智慧無盡又餘衆生於諸伎術
不能具足惟佛盡知無有減少是故如

來慧品具足又佛所說法善於義趣餘小智
人有所言說不能無過惟有如來所言無失
故知如來慧品具足又無量功德成此智慧
故能具足又說微妙法無有錯謬如不淨觀
破婬欲等又智慧勝故威儀亦勝以是等緣
慧品具足解脫品具足者於二無明心俱解
脫無有餘習永不退轉如是等名解脫具足
解脫知見具足者能於一切斷結道中念念
悉知如人伐木手執斲斧邊有智者知柯微
盡佛亦如是於斷結智念念所盡悉分別知
又知衆生深心所念如應說法令得解脫是
故能於衆生一切解脫道中知見具足又世

尊知時說法如銳劬盧梵志等也又如來善
知諸法差別應爲是人說如是法如佛語阿
難應爲車匿說離有無經是故如來善知解
脫又善方便斷衆生垢如爲難陀以欲斷欲
又先知衆生信等根熟然後說法如羅睺羅
又有衆生爲業報障不得解脫佛能令盡然
後說法又有衆生待時漏盡如夫婦經說又
有衆生待人漏盡如舍利弗待阿說耆又有
衆生待處漏盡如弗迦沙王又有衆生待伴
漏盡如放牛難陀待阿由陁村人等又有衆
生待佛眞身又待化身而得漏盡佛悉別知
而爲說法令得解脫又佛種種說妙法故能

破一切障解脫法故名解脫知見具足又佛
說法善於義趣不說非義無果報事又佛漸
次說解脫道猶如筭數是故易解又佛知衆
生宿植善根次第說法又佛現得解脫而爲
人說不從他聞又佛法具足多諸伎能如以
衆藥具足療病佛法亦亦以衆治門除一切
煩惱如九想等大小諸結不能反害故能具
足破諸煩惱又無上方便濟度衆生或以軟
語或以苦言或復兼以軟語苦言是爲如來
解脫知見具足

十力品第二

復次佛十力成就故智慧具足以往反因緣

故說十力初處非處力是因果中決定智知
從是因生如是果不生是果如行不善必得
苦報不生樂報是處名有是事非處名無是
事是初力者諸力之本問曰世間亦知因果
是處非處如從麥生麥不生稻等荅曰處非
處力知業等法故名此力甚深第一諸天世
人所不能及又了知生法因次第緣增上是
故此力名爲微妙謂知去來現在諸業及諸
受法知處知事知因知報是故此智名之爲
力以知三世處事因報故名甚深所以者何
或謂過去未來無法故佛於此說言有力又
法在過去未來世中雖無現相佛亦現知復

次業有二種若善不善或有善業而現受苦
如以持戒而受諸惱或有罪業今現受樂如
為破戒而得自在或有生疑謂未來世亦如
現在是故如來次業說受受法四種有現苦
後樂現樂後苦有現樂後樂現苦後苦佛悉
了知處事因報處名受者事名施物因名施
心如經中說先心歡喜施時心淨施已無悔
是業得果名之為報唯佛能知是業多少若
定不定現報生報及後報等悉知無餘故名
為力佛於諸禪解脫三昧三摩跋提知垢知
任知增知淨於此義中禪名四禪四無色定
即是色界無色界業解脫者謂八解脫能盡

是業是禪無色定及八解脫是爲三昧得是三昧用現在前名三摩跋提三摩跋提分別四種隨垢隨任隨增隨淨知垢者隨垢定也知任者隨任定也知增者隨增定也知淨者隨達定也隨達定者煖頂忍等四法是也佛於此等悉知無餘故名爲力佛了知衆生諸根利鈍信等根勝故名爲利如諸佛等鈍名不及如虵奴等無有中根以不定故利根有邊如諸佛鈍亦有邊如虵奴中無邊故不說中根復次有二種道信行法行復有二種道難道易道異此二道故名爲中觀人利鈍是故爲中又隨所樂故根有差別樂信根故名爲

信多有智慧人諸根皆勝以所樂故名和伽
利信根爲勝如是諸根悉知無餘故名爲力
佛知衆生各有所樂樂名爲欲如人樂酢則
欲於酢佛隨所樂各各別知謂是衆生樂於
五欲或樂修道如此知已隨宜說法故能廣
度一切衆生佛知世間無量種性衆生久習
所樂則成其性如調達等世世謗佛惡心轉
深便名爲性善性亦然或有衆生從性起欲
或緣現起如來悉知所樂及性故名爲力佛
知一切所至處道知行是道生地獄中乃至
生天知行是道得至泥洹是業皆從根欲性
性有漏業知生五道中無漏業故得至泥洹

先但說道今說道果又先摠相說今分別說
有如是業趣於地獄有如是業能到泥洹趣
地獄者亦有差別是業當墮活地獄中是業
當墮黑繩地獄是故佛於第七力中知微細
業餘人若知不能分別故名爲力佛如是知
過去業果名宿命智力又佛知衆生先所行
道知已說法故於宿命說有智力又佛念過
去一切生處若在色處若無色處自知己身
亦知衆生故名爲力佛天眼智見未來世三
有相續知三種業四種受法亦爲記說了知
無礙故名爲力以漏盡力知不相續衆生命
終或有相續或不相續是力皆爲一切衆生

先但說道今說道果又先摠相說今分別說
有如是業趣於地獄有如是業能到泥洹趣
地獄者亦有差別是業當墮活地獄中是業
當墮黑繩地獄是故佛於第七力中知微細
業餘人若知不能分別故名爲力佛如是知
過去業果名宿命智力又佛知衆生先所行
道知已說法故於宿命說有智力又佛念過
去一切生處若在色處若無色處自知己身
亦知衆生故名爲力佛天眼智見未來世三
有相續知三種業四種受法亦爲記說了知
無礙故名爲力以漏盡力知不相續衆生命
終或有相續或不相續是力皆爲一切衆生

至處道力摠說泥洹道今此力中廣分別說
佛因垢淨故有十力得九力故則智成就得
第十力故則斷成就智斷具足故名世尊天
人所敬

四無畏品第三

又佛成就四無所畏是故應禮四無所畏者
如來得一切智一切漏盡能說障道及盡苦
道此四法中若有人來如法難問我無所畏
初無畏者是一切智亦是九力第二名斷即
第十力智斷具足故如來自已功德具足後
二無畏今他具足佛說障礙是實障法所謂
不善或善有漏障解脫故名障礙法為離障

礙法爲離障礙故說出道問曰如汝此中所說
諸力卽是無畏今力與無畏有何差別荅曰
智名爲力以此力故有所堪受是名無畏有
愚癡人無慙愧故多所堪受如來堪受從智
慧生又以智故不畏他人故名無畏所以者
何或雖有智猶怯弱故又智名爲力能說是
智名無所畏所以者何有人雖知不善說故
又能勝他人名爲無畏所以者何有人雖知
不勝他故有智無盡故名爲力辯才無盡故
名無所畏復次說有義趣故名爲力所說自在
名曰無畏又因名爲力果名無畏以從智中
生無畏故有人從生怯弱後得少智便能無

畏何況世尊從久遠來其心廣大又得一切
智而當有畏又有人不能勝他故有所畏無
有一人佛不勝者故無所畏又有論者善於
言辭亦善義趣則無所畏佛即是也得一切
智故善於義趣得無礙辯故善於言辭或復
有人於事無力而生怖畏如來逮得一切智
故於一切事無不有力一切經書一切論義
皆悉通達明了問荅故無所畏復次有人短闕
若家若性若色若戒多聞智等故致譏論如
來於此都無所闕是故無畏又如法論者不
可破壞佛即是也如阿叔羅婆羅門語世尊
言如法論者難勝難壞順道論者思量論者

有因論者亦復如是復次若人成就四種論法亦難勝難壞一者住於正執二者受因非因三者能受譬喻四者住論法中佛具此四諸天世人無能勝者故無所畏復次不諮善師而論議者則易可壞如來昔曾於定光等無量佛所修習論法故不可壞又佛說二諦所謂世諦第一義諦是故智者所不能壞凡夫無智亦不與諍又佛不與世間共諍世間謂有佛亦說有世間謂無佛亦說無是故無諍以其無諍故不可壞復次論有二種一真實論二諂曲論諸外道等多諂曲論佛真實論故不可壞又佛法中正行淨故論議亦淨正行

清淨名盡苦因諸外道論有相似因無正因
故不能得勝又佛經清淨所說義趣不違實
相不同外道又佛所說道不但隨語皆心自
知如經中說佛告比丘汝等莫但信我語當
自知見自身證行又言汝來諸無諂者若我
晨朝爲汝說法令夕得道夕爲說法令晨得
道復次若人於法有所不達便止不言設有所
言亦必可壞佛無不達故能無畏又如來得
諸無礙智於一切法無不通達故無所畏又
小智不知大人所知大能知小佛於衆生最
爲大故能知小論故無所畏又諸外道論因
所見起佛知是見從衆緣生知集知滅知味

知過知出諸外道等不能盡知故生諍論佛
以一切種智知一切法故能破壞一切諸論
不爲一切諸論所壞故無所畏如是等緣名
力無畏差別義也問曰佛於諸法悉無所畏
何以但說四無畏耶荅曰說四則爲揔說一
切無畏所以者何前二無畏自說智斷後二
無畏爲他說障道法說盡苦道亦名智斷師
及弟子智斷具足故名揔說一切無畏問曰
衆生何故疑佛非一切智人荅曰佛所言說
或有似非一切智人如佛問曰汝從何來有
如是等又如經中說有人若至城邑聚落問
其名字我不說是一切智人聞斯經者疑佛

非是一切智人又佛所說似有貪著如經中
說佛言善來比丘汝於此身為得大利隨順
我法我則歡喜有似瞋語如語調達汝為死
人是食睡人有似慢語自言我是人中師子
成就十力四無所畏於大眾中能師子吼有
似見語言善持我法如擊油鉢有語調達我
不以眾與舍利弗目捷連況當與汝有小智
人聞斯等言便謂如來諸漏不盡又佛說諸
欲是障道法有人雖受亦能得道又毗尼中
所說遮法有人毀壞亦能得道小智疑佛不
知障法又人修道亦有結使小智生疑謂修
聖道不能盡結既不盡結何能離苦是故如

來於此四法說無所畏問曰如向所疑當云
何斷荅曰佛隨俗語世間亦有知而問者不
以爲過佛亦如是在世間故隨俗而問又世
間亦有心無貪著而言似有貪有如是等佛
亦如是利衆生故現有是言若言欲非障法
如來說欲實是障法若欲在心則無修道要
先除欲然後得道若言雖犯遮法猶得道者
破實遮法必無得道若非實罪以重緣故佛
還自聽非壞遮法若言修道亦有結者聖道
能破一切結使未具足故不能盡破譬如酥
性能破熱病以服少故不能消盡修道亦亦
是故無咎如來成就四無所畏是故應禮

十号品第四

復次經中說如來等十種功德謂如來應供
正徧知明行足善逝世間解無上士調御丈
夫天人師佛世尊如來者乘如實道來成正
覺故曰如來有所言說皆實不虛如佛問阿
難如來所言頗有二不不也世尊故名如說
又如來從得道夜至泥洹夜於其中間所說
皆實不可破壞故名如說有以一切種智知
前後際然後說故所言皆實又諸佛世尊憶
念堅固無所忘失有人或以比智而有所說
有隨經書或有現在不能善見而有所說是
人所說若得若失如經中說比智者言或得

或失佛於諸法現知已說是故所言皆不可
壞名實說者又佛所說皆說實義不如餘人
有實不實故不可壞又所言應時如經中說
佛知衆生心喜心樂乃說道法故名如說又
應爲說者即爲說之如緊叔伽經中說又所
應說法而爲說之所謂若略若廣陰入門等
是故所說無非真實復次有二種語法一依
世諦二依第一義諦如來依此二諦說故所
言皆實又佛不說世諦是第一義諦不說第
一義諦是世諦是故二言皆不相違復次如
來若遮若開亦不相違隨所爲事遮不即此
事開隨所爲事開不即是事遮是故所言皆

不相違又有三種語法一從見生二從慢生
三從假名生佛無二種語於第三語清淨無
染又有四種語法見聞覺知法佛於此四所
言皆淨心無貪著又有五種語法過去未來
現在無為及不可說是五種法佛悉通達明
了知已然後乃說故名如說能如說故名爲
如來以煩惱盡故得此法貪恚癡等是妄語
根本滅此諸結是故應供復次如來說應供
也是滅結法由正智生以無常等慧正觀法
故諸煩惱盡故因正智生應供法是正智法
從明行生前際後際及不相續善通達故得
名正智盡行施等波羅蜜故諸明行足餘人

亦於無始生死行施等法無正行故不名善
逝佛有正道行施等行故名善逝得此五法
如來自已功德具足得正智故能知世間一
切心念知所念已而爲說法故名無上調御
所當調者無不調伏已調伏者永不敗壞所
調伏者天人是也故名天人師或有生疑云
何以人而能化天故言我是天人師也佛者
若過去未來現在諸法有爲無爲有盡無盡
若麤細等一切諸法坐道場時除無明睡得
一切智朗然大悟故名覺者如是九種功德
具足於三世十方世界中尊故名世尊佛十
号具足故自身具足他亦具足自利利人是

故應禮

三不護品第五

佛身口意業不護所以者何佛無不淨身口
意業欲令他人不見不知又諸餘人或有無
記似如不淨身口意業智者所呵佛亦無也
所以者何如來一切身口意業皆由智慧正
憶念起若諸忘念少智之人無如是業又世
間人或卒誤語佛無此等又佛善修身戒心
慧如是等法以善修故一切不善及似不善
業皆悉除滅又世尊從久遠來修行善法不
適今也是故諸業性淨不護又佛常樂戒行
不以怖畏墮惡道等又佛一切身口意業皆

爲利人故無不善以無不善故不須護以淨
不護業是故應禮又佛成就三念處故所以
應禮若說法時聽者一心不以爲喜若不一
心不以爲憂常行捨心所以者何佛貪恚習
無有餘故又知諸法畢竟空故無憂無喜又
佛善集大悲心故於善不善心無憂喜等起
大悲又佛深知衆生各各性故若善心聽不以
爲喜不善心聽不以爲憂以性尔故常行捨
心又佛心堅固猶如大地去重不高若置重
物亦復不下餘凡夫人其心如秤少增而下
少減而高又佛世尊名大悲者是故天人皆
應敬禮有捨深禪定樂爲人說法餘人悲心

無所成辦世尊大悲能濟衆生故名有果又
以大悲成無上道更無餘緣復次佛無我心少
欲知足最爲第一以大悲故自歎己身又佛
性柔和以大悲故有苦切言起大方便受諸
勤苦爲度衆生又佛以大悲度衆生故住於
世間受五陰身如熱鐵丸於須臾頃不可堪
忍又佛世尊善修捨心捨心常行大悲
故可尊敬又佛爲善人善中之善所以者何
自得大利亦利他人自利利人故名善人又
佛爲衆生眞善知識如經中說我是衆生眞
善知識是憐愍者利益者等又佛世尊有精
進等諸功德聚如和利以百句讚佛有此功

德是故應禮又佛自說功德如增一阿含如
來品中自說我是人中師子人華人象於沙
門中第一婆羅門中亦是第一衆聖中王行
無錯謬不隨苦樂者我身是也問曰佛以何
故自讚其身自讚其身者是愚人相荅曰世
尊不求名利但爲他故自歎己身又佛無我
心爲利人故自歎無名又以因緣少多自讚
於佛功德不能說盡是故不墮愚人相中不
自高故又如清淨經中舍利弗住於佛前讚
佛功德是故應禮又少欲知足等無量功德
皆在佛身所以者何佛集一切諸功德故以
是等緣應敬禮佛

法寶論初三善品第六

問曰汝先言應禮法以何功德故應禮耶答
曰佛自讚言我所說法初中後善義善語善
獨法具足清淨調柔隨順梵行初中後善者
佛法無時不善於少壯老三時皆善入時行
時出時亦善又初止惡中捨福報後一切捨
是名三善又佛三時常說正法不雜非法如
餘外道又初中後時常爲智者之所愛樂又
於三時一切甚深不如餘經初鹿中細後則
微末以是等緣故名三善義善者佛法義有
深利益得今世利及後世利出世道利不如
外典願增天眼語善者隨方俗語能示正義

故名語善所以者何言說之果所謂義也是
故諸所言說能辨義理是名語善又佛法貴
如說行非但言說是故隨方俗語能令得道
名爲語善不如外典但貴語言若失語言若
失音聲辭主得罪又善說真諦故名義善善
說世諦故名語善獨法者佛但說正法不爲
戲論說往古事亦不雜說法及非法又但爲
無餘涅槃故說又獨佛能說故曰獨法問曰
又聲聞部經但聲聞說又有餘經諸天神說
汝何故言獨佛說耶荅曰是法根本皆從佛
出是諸聲聞及天神等皆傳佛語如毗尼中
說佛法名佛所說弟子所說變化所說諸天

所說取要言之一切世間所有善語皆是佛說故名獨法具足者佛所說法無所減少如鬱陀羅伽經中說具足相又佛法中不待餘經而得成也如和伽羅那經待五種經然後得成佛法不介於一偈中其義具足如說諸惡莫作諸善奉行自淨其意是諸佛教故名具足清淨調柔者二種清淨故名清淨調柔語清淨故名曰清淨義清淨故名曰調柔又佛聽於正義中置隨義語於正語中置隨語義不如外道隨經而取又佛法中依法不依人法亦分別依了義經不依不了義經是名淨法非但隨經又佛法中有三法印一切無

我有為諸法念念無常寂滅涅槃是三法印
一切論者所不能壞以真實故名清淨調柔
隨梵行者八直聖道名為梵行是名涅槃道
能到故名梵行法寶成就如是功德是故應禮
衆法品第七

復次佛自讚言我法能滅能到涅槃能生正
智能善將導能滅者滅貪恚等諸煩惱火故
曰能滅如習不淨觀滅婬欲火如習慈心滅
瞋恚等不如外道斷食等法故名能滅能到
涅槃者佛法究竟必至涅槃不如外道任有
分中著禪定等又佛法中說一切有為皆有
過患無稱讚處不如婆羅門讚梵世等故名

佛法能到涅槃能生正智者所有佛法皆爲
涅槃是故能生正智又佛法中有真智果如
從聞慧生思慧從思慧生修慧故名佛法能
生正智能善將導者佛法先自善成後令他
人住正法中故名善導又佛法有六一曰善
說二曰現報三曰無時四曰能將五曰來嘗
六曰智者自知善說者佛說諸法如法實相
若不善法說不善相善說善相故名善說現
報者佛法能得現世果報如經中說晨朝受
化令夕得道夕爲說法令朝得道又現報者
如現在沙門果經中說現得恭敬名聞禪定
神通等利又佛法皆有義理故能致得恭敬

現報後報及涅槃報諸外道法無義理故尚
無現報及後世報何況涅槃故名現報無時
者佛法不待某日月歲星宿吉凶乃得修道
某日月歲不得修道不如婆羅門法初春婆
羅門受火春末刹刹受火等復有或待日出
或日未出而供養火如見五穀待時而種或
謂佛法亦當如是故說無時如經中說佛法
易行行住坐卧無時不得能將者以正行故
能將衆生至解脫處故名能將來嘗者佛法
應當自身作證不但隨他如佛語比丘汝等
莫但信我語當自思惟是法可行是不可行
不如外道語弟子言捨是問荅如人淨洗不

喜塵土當如聾瘂但隨我語故曰來嘗智者
自知者是佛法利智慧人乃能信解斷食等
麤愚者信樂智者不受以正智慧能破煩惱
如是等法智者乃解雖以甘膳充足其身一
心精進貪恚不染如是等事智者現知如人
病愈自知得離如水相冷飲者乃知又或有
過語法如地堅相堅何等相不得語答觸乃
可知如生盲人不可語以青黃赤白若人不
得佛法味者不可語以佛法實義以寂滅故
復次佛法可自證知不可以已所證傳與他人
如財物等如婆羅延經中佛言我不能自斷
汝疑能證我法汝疑自斷又是法到他身時

不可得見如火傳等又凡夫愚人爲無明山
所障覆故不信是法如因阿夷羅越沙弥說
大山喻故言智者自知又佛法甚深開示則
淺斷除虛僞流布天人甚深者佛法甚深以
不知因故世間多見現果不能知因故說自
在天等邪因十二因緣深故難解世間智淺
於佛法中不生深想不能通達衆因緣法乃
至小草以衆因緣思惟觀察其相轉深如佛
所說衆因緣法是事甚深愛盡離滅及涅槃
處是亦難見問曰若因緣甚深阿難何故生
淺想耶荅曰有論師言是語不然阿難是大
弟子通達法相云何當言因緣法淺又若以

揔相觀因緣法故生淺想所以者何是人不能善分別觀煩惱業故又若人於本所學事得究竟便生淺想如得智還觀初章或復有人智慧未成於甚深法則生淺想有佛善說法故或有衆生便生淺想又佛法皆空是空甚深佛以種種因緣譬喻宣示義則易解小兒亦知如須陀耶沙彌等又佛法堅固諸言說中最爲真實不如婆羅陀羅摩延經等但有語言無有實義如盧提梵志言世尊諸比丘等於利益法真實法中精勤修學所謂漏盡又佛法爲利一切世間故說不如婆羅門言婆羅門法但自得道餘人不得又佛法尊

重諸天王等五欲自恣亦來信受以是因緣
故應禮法

十二部經品第八

復次佛法分別有十二種一修多羅二祇夜三
和伽羅那四伽陀五憂陀那六尼陀那七阿波
陀那八伊帝曰多伽九闍陀伽十鞞佛略十
一阿浮多達磨十二憂波提舍修多羅者直
說語言祇夜者以偈誦修多羅或佛自說或
弟子說問曰何故以偈誦修多羅荅曰欲令
義理堅固如以繩貫華次第堅固又欲嚴飾
言辭令人喜樂如以散華或持貫華以爲莊
嚴又義入偈中則要略易解或有衆生樂直

言者又樂偈說又先直說法後以偈誦則義
明了今信堅固又義入偈中則次第相著易
可讚說是故說偈或謂佛法不應造偈似如
歌詠此事不然法應造偈所以者何佛自以
偈說諸義故又如經言一切世間微妙言辭
皆出我法是故偈頌有微妙語和伽羅那者
諸解義經名和伽羅那若有經無答無解如
四無礙等經名修多羅有問答經名和伽羅
那如說四種人有從冥入冥從冥入明從明
入明從明入冥從冥入冥者如貧賤人造三
惡業墮惡道等如是等經名和伽羅那問曰佛
何故說無答無解經答曰有經義理深重是經

義阿毗曇中當別說是故不解或有人言佛
所說經皆有義解但集法者撰深義經置阿
毗曇中如因內結外結人終夜解義此義應
在結使聚中伽陀者第二部說祇夜祇夜名
偈偈有二種一名伽陀二名路伽路伽有二
種一順煩惱二不順煩惱不順煩惱者祇夜
中說是名伽陀除二種偈餘非偈經名憂陀
那尼陀那者是經因緣所以者何諸佛賢聖
所說經法要有因緣此諸經緣或在修多羅
中或在餘處是故名尼陀那阿波陀那者本
末次第說是也如經中說智者言說則有次
第有義有解不令散亂是名阿波陀那伊帝

曰多伽者是經因緣及經次第若此二經在
過去世世名伊帝曰多伽秦言此事過去如是
闍陁伽者因現在事說過去事如來雖說未
來世事皆因過去現在故不別說鞞佛略者
佛廣說名鞞佛略有人不信謂諸大聖樂寂
滅故不喜憤鬧厭世雜語拔樂衆根故不樂
廣說如經中說有得道人過二月已乃出一
言爲斷此故說有廣經饒益他故如說如來
二種說法一廣二略廣勝略故阿浮陁達磨
者未曾有經如說劫盡大變異事諸天身量
大地震動有人不信如是等事是故說此未
曾有經現業果報諸法勢力不思議故憂波

提舍者摩訶迦旃延等諸大智人廣解佛語
有人不信謂非佛說佛爲是故說有論經經
有論故義則易解是十二部經名爲佛法法
寶具足如是功德是故應禮

僧寶論初清淨品第九

問曰汝先言應禮僧何故應禮答曰佛於處
處自稱歎曾走僧寶戒品清淨定品慧品解
脫品解脫知見品清淨應請應禮合掌供養
無上福田能益施者戒品清淨者佛弟子衆
持戒無瑕乃至小罪深懷畏懼又佛弟子不
爲福報生人天等亦不怖畏墮地獄等而勤
持戒但樂善法故名清淨又持淨戒不限時

節不如婆羅門六月持戒長夜受持乃至究竟故名清淨又持淨戒離於二邊離五欲樂亦離苦身故名聖所愛戒是戒名爲智者所愛又心淨故戒亦清淨又深心止惡不但守戒怖畏後世故名僧寶戒品清淨定品清淨者若定能生真智故名清淨慧品清淨者若慧能盡煩惱故名清淨解脫清淨者若得盡諸煩惱非但能遮故名解脫清淨解脫知見清淨者於諸煩惱盡中得智謂我生盡非未盡煩惱中言我生盡是名解脫知見清淨應請應禮供養者以能具足如是功德故應求請禮敬供養福田者於中植福獲報無量乃

至涅槃猶不可盡能益施者能令施者功德
增益如八功德田滋茂五穀不令敗壞僧田
亦令成就八功德故能令施者功德增長是
故應禮

分別賢聖品第十

問曰以何法故名之爲僧答曰四行四得戒
定慧等功德清淨故名爲僧四行者行須施
洹行斯陀含行阿那含行阿羅漢四得者須
施洹斯陀含阿那含阿羅漢行須施洹者有
三種人一隨信行二隨法行三隨無相行信
行者若人未得空無我智信佛法故隨佛語
行故名信行如經中說我於是事以信故行

若得眞智則不但隨信行如經中說知不作者
不信者等是名上人是故當知未得眞智名隨
信行如經中說若人於法能以智慧觀忍樂
者是名信行過凡夫地未得須陀洹果於其
中間不得命終是名信行是人在聞思慧中
正觀諸法心忍欲樂雖未得空無我智能生
世間似忍法心自此已來名過凡夫地所以
者何後當廣說若無信等五根是人則住外
凡夫中是人漸習得煖法等修慧仍本名故
亦名信行以終不及法行人故是經應言要
必當得須陀洹果不應言不得命終所以者
何是信行者以尚遠故如郁伽長者供養衆

僧天神示言某是阿羅漢某是行阿羅漢者
乃至某是須陁洹某是行須陁洹者若在十
五心中不可得示當知行須陁洹者有近有
遠是名信行法行者是人得無我智在煖頂
忍第一法中隨順法行謂空無我等是名法
行是二行人入見諦道見滅諦故名無相行
是三種人名行須陁洹者世俗道中無斷結
故不得名爲行三果者此事後當說須陁洹
者如佛經說若人斷三結身見疑戒取名須
陁洹不墮惡道必得正智極至七有問曰若
須陁洹見諦所斷煩惱都盡滅無量苦如地
喻經說何故但言斷三結也荅曰此事後當

廣說謂身見盡故餘等亦盡不墮惡道者後
業聚中亦當廣說必至菩提者是入法流
中必至涅槃如木在恒河離八因緣必到大
海極七有者是人於七世中無漏智熟如歌
羅羅等七日變成又如服蘇等極至七日堅
病則消又如親族限至七世又如七步蚘螯
人身時以四大力故得至七步以毒力故不
得至八又欺誑法極至七世又如七日出時
則劫燒盡如是七世集無漏慧燒煩惱盡又
法應七有有須陀洹今世入涅槃有第二第
三極至第七是名須陀洹行斯陀含者思惟
所斷結有九品若斷一二至三四五是名行

斯陀含者有人言以一無礙道斷是事不然
佛經中說以無量心斷如斧柯喻經中說又
行斯陀含者亦名家家人或二或三往來
或於現身得入涅槃是名行斯陀含者斯陀
含者一來此間便入涅槃是人思惟所斷結
薄住是薄中名斯陀含是斯陀含或今世入
涅槃行阿那含者若斷第七第八品結是人
皆名行阿那含者斷第八品是名一種行阿
那含者或有今世即入涅槃盡離欲界九品
結故名阿那含是阿那含差別八種所謂中
陰滅者有生有滅者有不行滅者有行滅者
有上行至阿迦尼吒滅者有至無色處者有

轉世者有現滅者隨上中下根故有差別中
陰滅者亦有三種上中下根有阿那含深厭
世間有少障礙不得現滅是人則於中陰中
滅生有三種謂生滅者行滅者不行滅者生
滅者生時深厭離有即入涅槃是名生滅以
根利故或有生已諸無漏道自然在前不加
勤行而入涅槃是不行滅以根中故或有生
已深畏受身勤修行道乃入涅槃是名行滅
以根鈍故上行滅者亦有三種若從一處終
至一處生便入涅槃是名利根二三處生是
名中根一切處終一切處生是名鈍根從初
禪至廣果天是名決定到廣果已若生淨居

是人不復到無色處以樂慧故若入無色處者是人終不生淨居天以樂定故轉世者若先世得須陀洹果斯陀含果後轉身得阿那含果是人不入色無色界現滅者第一利根即於現身得入涅槃復有二人一名信解脫二名見得是二人者根差別故若鈍根學人在思惟道名信解脫利名見得若阿那含具入解脫是名身證是等皆名行阿羅漢者以斷結同故若盡斷滅一切煩惱名阿羅漢阿羅漢有九種退相守相死相住相可進相不壞相慧解脫相俱解脫相不退相是諸阿羅漢以得信等根故有差別最鈍根者是名退相

退失三昧退三昧故無漏智慧不能現前守
相者根小勝故若護三昧則不退失不護則
退前退相者雖護亦退死相者根又小勝深
厭諸有是人不能得三昧故無漏智慧難得
現前設得喜失故求死也任相者若得三昧
不進不退是名任相前三種在退分三昧任
相者在任分三昧可進相者若得三昧轉深
增益是人任在增分三昧不壞相者得三昧
已種種因緣不能敗壞是人任在達分三昧
慧最利故善取三昧入任起相故不可壞因
滅盡定故有二人不得此定名慧解脫得此
定者名俱解脫不退相者所作功德盡無退

失如經中說佛語比丘若我弟子以牀輦我
我先所得盡無退失如是九種名無學人先
十八學人及九無學是二十七人名爲世間
一切福田僧中具足是故應禮

福田品第十一

問曰以何等故此諸賢聖名爲福田答曰斷
貪恚等諸煩惱盡故名福田如說稊稗不去
害善穀苗是故施無欲人得報利大又是人
心空故名福田所以者何以空相故諸貪恚
等煩惱不起不生惡業又諸賢聖得不作法
故名福田又是人等所得禪定皆悉清淨永
離大小諸煩惱故又棄捨憂樂故名福田又

能斷除五種心縛心得清淨故名福田又成就八種功德田故又以七定具善護心故又能盡滅七種漏故無諸漏失又具足戒等七淨法故又能成就少欲知足等八功德故又能度彼岸及勤求度故名福田又經中說但能發心欲行善法尚多利益況修行耶是諸賢聖常行善法故名福田又經中說誰施主家有持戒比丘受供養已入無量定是施主家得無量福衆中有入無量三昧無相三昧無動三昧能令施主得無量報故名福田又經中說三事和合故得大福一曰有信二曰施物三曰福田於衆僧中多功德人功德人

中信心易生又施衆僧具九因緣故獲大果
又施衆僧以受者淨故施必清淨又施有八
種有清淨心少施物亦少施破戒人有清淨
心少所施物多施破戒人有清淨心少施物
亦少施持戒人有清淨心少所施物多施持
戒人有清淨心多施四種物亦余於僧中施
必當成就若二若三一切善人皆因衆僧增
益功德然後隨意迴向菩提又所施僧此物
皆當得解脫果於生死中終不能盡又所施
衆僧皆爲嚴心又若於一人生信淨心或時
可壞於衆僧中信心清淨終不壞敗又於一
人生愛敬心或不能廣於衆僧中生信敬心

緣無量故心則廣大又施為一切入僧數人
以心大故果報亦大以是等緣諸賢聖人名
為福田是故應禮

成實論卷第一

西

翳

一計

名聞

下音

錯謬

下音

燈炷

下音

漆

佛處

下尺

頃

傾領

斲斧

上音

卓亦

作

柯音

劬

上音

車

匿

下尼

說者

上音

悅

植殖

二

同常

伎

倚

治

二值

持

軟

稻音

下

徒

難

問

上音

怯弱

上音

劫

利鈍

逮

上音

甘

饅

下時

鞞

佛略

下音

遮

困

反

醑

聲

去音

若

反

反

反

逮

上音

甘

饅

下時

鞞

佛略

下音

遮

舉	聲	憤
余上	螫	鬧
亦床	一呼	下上
作字	音各	女俱
昇下	釋反	兒妹
音	劫	反反
稊	燒	瑕
稗	聲下	遐音
蒲上	去	郁
賣音	尼	伽
反音	叱	六上
下	嫁下	反於
	反竹	厭
	反一	羅
	焰	羅
	牀	去下



